

CHELDECHEDECHAL A RENGELDIL

**Written By
Clara Orrenges**





A Ngiralomes me a
Dirralomes a mle teru el
obekel. Ng mla er ngii a
chimo el ngelekir el redil. A
mle ngklel a Taldil. Tirka a
kmal mle ungil el telungalek.

A chudelel a Dirralomes a
dimlak a ngelekel Ngii me a
bechil a kmal mle sorir el
oungalek. Ng di ngii a dimlak
el omechell. Ngii me a bechil
a kmal mle sorir a Taldil. Te

kmal di ulemais el mo omes
er a Taldil. Te mlo sorir el
mero-del er a Taldil. Ng di a
Ngiralomes me a bechil a mle
mekreos er a Taldil. Ng kmal
di mle chimo el ngelekir me
te dimlak el sorir a lorodel er
ngii.

Ng mlo chuib a ta el rak e a
Dirralomes a mlo dioll. A
chudelel a rirenges a chisel.
Ng mlo omes er a Dirralomes
er a blil. Ng mlo me ng

melekoi er ngii el kmo,
"Merrengei, a lsekum e ke
mechell e a kme nguu a
ngalek me ng ngelekek."

"Bechere me a leme a bechik
e kulekoi er ngii. Me a
lsekum e ng di ungil er a
rengul e ke nguu me ng
ngelekem." Ng dilu a
Dirralomes. A chudelel a
Dirralomes a kmal mlo ungil
a rengul Ng mlo er a blil e
ouchais er a bechil A bechil a

dirrek el kmal mlo ungil a
rengul.

Tia er a lebocha el kebesengei
e a Dirralomes a mocha
melekoi er a bechil er tia el
ongtil a chudelel A
Ngiralomes a kilenge er a
bechil.

Tia er a lemechell a
Dirralomes e ng redil a
ngelekel. Ngii me a bechil a
milngeklii ngika el ngelekir el

Rengeldil. A Rengeldil a mlo
eim el bilel e a chudelel a
Diralomes me a bechil a
merema el me melai er ngii.
Te mle melai er a Rengeldil el
mo ngelekir. Te ngiluu el mo
er a blirir. Te kmal mlo ungil
a rengrir e le ng mla mo er
ngii a ngelekir.

Ngika el chudelel a
Diralomes me a bechil a kmal
mle ungil er a Rengeldil. Te
kmal mle blak a rengrir el

omekeroul er ngii. A
Rengeldil a kmal mle
cheleoch er tir. Ng kmal mle
betok a bilel me a kloklel,
Aike el rokui el soal el klalo a
di lebo el siik el msang.



Se el ngar er ngii a kall el me
er a blirir e te ngmilt aike el
ungil el meche el kelel a
Rengeldil. Ng dirrek el se el
ldu a Rengeldil el kmo ng
soal el menga er a ngara e te
kmal di mo. meche aike
loruul e mo osiik er se el soal
a Rengeldil. Te dimlak el
sorir el tomelii a rengul a
ngelekir. Te kmal di
millemolem aike el soal.

A Rengeldil a mlo klou e mo
er a skuul. Se el lebo el merek
er a skuul e ng di me er a blai
el omengur e merael el mo
milil. Ng dimlak lolengeseu
er a delal el meruul a ureor er
a blai. A delal a di milecherei.
Ng dimlak loldurech er ngii el
meruul a ureor er a blai.

A ta er a klebesei a demal a
Rengeldil a mlo smecher. Ng
mlo niuing er a osbitar Ng
kirel el ngar er ngii a chad el

oba e le ng diak el sebechel el
di ngii el mekiis el mo
dengchokl. Ng dirrek el diak
el sebechel el di ngii el
omengur. A delal a Rengeldil
a kirel el mo oba a bechil er a
osbitar.

Ng dilu er a Rengeldil el
kmo, "Rungalek, ak mo er a
osbitar el mo oba a demam e
kau a mo kiei el obengterir a
rua Dirralomes e ngar er a
skuul. Ng diak el sebechem el

di kau el ta el kiei er a blai."
A Rengeldil a mle chetil e ng
di ng dimlak a cheldechulel
me ng mocha konge er a
delal.

Tia er a lebocha el kukuk e a
delal a Rengeldil a mocha er
a blirir a rua Dirralomes. Ng
mlo me ng melekoi er a
Dirralomes me a bechil el
kmo, "Ng diak el sebechel a
Rengeldil el me me lekiei el
obengkemiu. Ak mo oba a

bechik el ngar er a osbitar e a
Rengeldil a diak el sebechel
el di ngii el ta el kiei er a
blimam."

A Ngiralomes me a
Dirralomes a dula er a delal a
Rengeldil el kmo, "Ng kmal
di ungil er a rengmam a lebe
lekiei el obengkemam a
Rengeldil," A delal a
Rengeldil a kmo, "Kom kmal
mesula e kurael el mo reme
me kungedmokl a kloklel a

Rengeldil me a klukuk a kbe
kngederii."

Tia er a lebocha el kukuk e a
delal a Rengeldil a mocha
merader er a Rengeldil er a
blirir a rua Dirralomes. A
Rengeldil a dimlak el soal el
obengterir a rengelekel a
Dirralomes. Ng di mle
blechoel el outoketok e okoad
er tir. Ng kmal mle mekngit a
rengul e di ngara e ng
ngmasech a rengul. Ng

dimlak el soal a rengelekel a
Dirralomes a lousbech a
klokkel. Se el lesa a klokkel a
ta er a rengelekel a
Dirralomes el soal e ng di mo
melai er ngii.



A Rengeldil a dimlak loruul a
ureor e di mililil. Ng di se el
ldu er ngii a Dirralomes el
kmo bom rellii a ngara e ng
mong. A lsekum ng diak el
ldu er ngii e ng diak loureor.
Ng mle metitur el meruul a
ureor me se el loruul a ureor e
ng di mekngit.

A rengelekel a Dirralomes a
kmal mle ngodech a
blekerdelir er a Rengeldil. Te

kmal mle mekedung e
medengei a urerir me a
ngerchelir, Se el tutau e te
omkokl el mekiis me te
remuul a urerir e mo er a
skuul. Se el lebo el merek er a
skuul e te orreched el mo
reme me te remuul a urerir e
mochu milil. A Rengeldil a
diak. Ng di mechiuaiu el mo
er se el soal el taem e mekiis
el mo melecholb e kudmeklii
e omengur e merael el mo er
a skuul. Se el lebo el merek er

a skuul e ng diak lorreched el
mo reme e milil el mo
klebesei. Se el lebo el rei e a
rebek el chad a mla mo merek
el omesoil me ng kuk di ngii
el ta el omesoil.

A ta el tutau e a Rengeldil a
ulemkokl el mekiis, Ng
milekiis e mo er a iikr me ng
dengchokl er a iasumba el
ngar er a uchul a
chedebsachel. Ng dilengchokl
e a rebek el chad a meruul a

urerir, Ng di mle ngii el ko er
a mlo merur e le ng di ngii el
ta el dengchokl e a rebek el
chad a oureor. Ng mekisa el
mocha olengeseu er a Taldil
el meruul a kall.

A Dirralomes me a Taldil a
mlo diak losilek a bilel a
Rengeldil me ng di milrael el
mo diak a bilel, Ng di mlo
selokel el rokui, Ng mlo
meleng a bilel a Taldil.



Ng di a Taldil a dimlak el bsa
a bail e oker er ngii el kmo,
"E Rengeldil, ng ngara me ke
meleng a bail? Ng ko er a
kmal betok a bilem?" Me a
Rengeldil a dula el kmo. "Ng
betok a bilek e ng di selokel
el rokui." A Taldil a kmo, "A
lsekum e ng di selokel a
bilem er rokui e bo msilek me
lebo el sebechem el oubail.
Ng diak di mousbech er a
rechad el meruul a rokui el

tekoi el kirem A rebek el
chad a di mechesa el meruul a
kirir me a ngerchelir." Ng
mlo diak a cheldechulel er a
Rengeldil me ng mocha di
ngii el mesilek a bilel.



A ta er a klebesei e a Taldil
me a Rengeldil a di mle tir el
teru el ngar er a blai. Te
milngedmokl er a blai e
meruul a kall. A Taldil a
mocha mengedecheduch er a
Rengeldil. Ng dilu er ngii el
kmo, "Sa e Rengeldil, a
deredil e ng ngar er ngii a
ngerecheled. Ng kired el
mengedmokl er a blai e
meruul a kall. Ng kired el
olengeseu er a delad el

meruul aike el rokui el ureor
er a blai. Ng diak di doilil e
dousbech er a rechad el
meruul a rokui el tekoi el
kired. Ng kired el mo meduch
el di kid el mangedmokl er
kid e meruul a kired. Ng diak
di dousbech er a rechad er a
blid e le ng diak di
dobengterir el mo cherechar.
A lmuut el tang, a lsekum a
rechad er a blid a kmal ungil
er kid e ng kired el kmal mo
orrenge a tekingir olengeseu

er tir."

A Rengeldil a di mle ngii el
ko er a mo merur er a aika el
blekerdelel. Ng mlo melasem
el mo meruul er ngii el mo
ungil.





Ng mlo diak di loilil e mlo
meruul a ureor er a blai. Ng
mlo olengeseu er a
Dirralomes me a rengelekel el
redil el meruul a ureor er a
blai. Ng mlo omkokl el
mekiis a ltutau e remuul a
urerel er a uche er a lebo er a
skuul. Se el lebo el merek er a
skuul e ng orreched el mo
reme me ng remuul a urerel e
mochu milil. Ng dirrek el mlo
diak el di loutoketok e lokoad

er a rengelekel a Dirralomes.

Te kmal mlo ta a rengrir. Te
dirrek el kmal di mle blechoel
el kaingeseu se el loureor. A
Rengeldil a kmal mlo ungil a
rengul e kmal mlo soal el
obengterir a rengelekel a
Dirralomes.



A demal a Rengeldil a mlo
ungil el smecher me ngii me a
delal a Rengeldil a mlo remei.

A Rengeldil me ng dirrek el
mlo reme er a blil. Ng kmal
mlo ungil a rengul er a lesa a
demal el kmal mla mo
mesisiich. Ng dirrek el kmal
el ungil a rengul el lmuut el
mo kiei el obengkel a delal
me a demal.

A delal me a demal a

Rengeldil a kmal mlo mechas
a rengrir er a Rengeldil. Ng
kmal mla mo ngodech a
blekerdelel. Ng kmal mle
kerekikl el meruul a ureor er
a blai e olengeseu er a delal er
a rokui el ureor. Se el loruul
a kall a delal e ng mo me ng
dmu er a delal el kmo,
"Chedil, beche e bo
mdengchokl e kuruul a
keled." A delal a kmal mlo
ungil a rengul er a Rengeldil.

Se el tutau e a Rengeldil a
omkokl el mekiis el
kudmeklii a blirir. Ng dirrek
el remuul a kelel a delal me a
demal me te omengur el mo
merek e ng mo kudmeklii e
merael el mo er a skuul.





Se el lebo el merek er a skuul
e ng orreched el mo reme me
ng remuul a urerel e mo milii
ngii me a resechelil. Ng di
milil el telkib e mo reme me
ng meruul a kelir er a
kebesengei. A Rengeldil a
kmal mle ungil a rengul el
ngalek me ng kmal mle betok
a resechelil.

A delal me a demal a
Rengeldil a kmal mlo ungil a

rengrir er a Rengeldil. A
demal a Rengeldil a dula er a
delal a Rengeldil el kmo,
"Kede kmal ngeltengat el mlo
oungalek er a Rengeldil me
ngikakid el kmal lolengeseu
er kid er a rokui el tekoi."

EXERCISE

I. OMESODEL:

Monguiiu aika el ker el ngar
er eou e moluches a nger er
ngii er a eungel.

1. Ng ngara me a chudelel a
Dirralomes me a bechil a mle
sorir el merodel er a; Taldil?

2. Ng ngara me a Ngiralomes
me a Dirralomes a mle
mekreos er a Taldil er a
lorodel er ngii a chudelel a
Dirralomes me a bechil?

3. Te rua techa a rirdelii a
Rengeldil?

4. Ng ngara me a Rengeldil a

mlo kiei el obengterir a rua
Dirralomes?

5. Ng ngara me a Rengeldil a
di mle blechoel el outoketok e
okoad er a rengelekel a
Dirralomes?

6. Ng ngara me a Rengeldil a
mlo meleng a bilel a Taldil?

7. Ng techa a mlo mesilek a
selekelel a Rengeldil?

8. Ng ngara me a Rengeldil a
mle metitur el meruul a ureor
er a blai?

II. OMESODEL:

Monguiu aika el uldasu
(sentences) el ngar er eou e
mosiik er a mo ungil el
omechelel a uldasu (sentence)
er a aike el tekoi me a lechub
e ng phrase el ngar er a
eungel a uldasu (sentence).
Ke loia a chaibibeob er a
llechukl (letter) el ngar er a

uche er a tekoi el ungil el mo
omechelel a uldasu
(sentence).

OLECHOTEL:

A Dirralomes a _____.

- a. dimlak a ngelekel
- b. dimlak a bechil
- c. rirdelii a ngelekel
- d. mla er ngii a ngelekel

1. A chudelel a Dirralomes
me a bechil a _____.

a. mla er ngii a ngelekir

b. mle sorir el merodel er a
Taldil

c. rirdelii a Taldil

d. mle chetirir el ngalek er a
Taldil

2. Ng mlo chuib a ta el rak e a
Dirralomes a _____.

a. mlo smecher

b. mlad

c. mlo diak el bechil

d. mlo dioll

3. A Dirralomes a milechellii
a ngelekel el redil e
milngeklilii ngii me a bechil el

- _____.
- a. Rengeldil
 - b. Taldil
 - c. Remeldil
 - d. Kekereildil

4. A Rengeldil a lrirdelii a

- _____.
- a. merrengel a Dirralomes me
a bechil
 - b. ochedal a Ngiralomes me a

bechil

c. chudelel a Dirralomes me a
bechil

d. obekul a Ngiralomes me a
bechil

5. Se el ldu a Rengeldil el
kmo ng soal el menga er a
ngara e a delal me a demal a

_____.

a. choklii e diak el lebo el
osiik er se el soal a Rengeldil

b. di mo meche aike el loruul
e mo osiik er se el soal a

Rengeldil

c. dmu er ngii me ng di ngii el
mo osiik er se el soal

d. di lmuk er a Rengeldil e di
mechere me ng di melekoi

6. A demal a Rengeldil a mlo
smecher me ng mlo niuing er

a. _____.

a. bai

b. blirir

c. blirir a rua Ngiralomes

d. osbitar

7. A Rengeldil a mlo diak a
bilel e le ng

a. ng ngilai a bilel el rokui el
mo chemoit

b. ng diak el osilek me ng di
mlo selokel el rokui

c. ng ngilai a Taldil el mo
mart

d. ng silodel a Taldil el rokui

8. A demal a Rengeldil a mlo
ungil el smecher me ngii me a
delal a Rengeldil me a
Rengeldil a mlo _____.

- a. kiei el obengterir a rua
Dirralomes
- b. remei er a blirir
- c. kiei er a bai
- d. er a ta er a beluu

IV. OMESODEL:

Monguiiu aika el uldasu
(sentences) el ngar er eou e
mlia a (choi) er a uche er a
uldasu (sentence) a lsekum e
ng merang. Mlia a (diak) a
lsekum a uldasu (sentence) a
diak el merang.

OLECHOTEL:

diak

A chudelel a Dirralomes a
rirdelii a Taldil me ng
ngelekel.

choi

A rengelekel a Ngiralomes
me a Dirralomes a kmal mle
mekedung.

A chudelel a Dirralomes a
mla er ngii a ngelekel el
chimo el redil.

A chudelel a Dirralomes me a
bechil a rirdelii a Rengeldil
me ng ngelekir.

A Rengeldil a kmal mle
cheleoch er a delal me a
demal.

A delal a Rengeldil a kmal di
uleldurech er a Rengeldil el
meruul a ureor er a blai.

A delal me a demal a
Rengeldil a dimlak el sorir el
tomelii a rengul a ngelekir me
te di millemolem aike el soal.

A ta er a klebesei a demal a
Rengeldil a mlo smecher.

A Rengeldil a mlo oba a
demal er a osbitar.

A Rengeldil a kmal mle soal
el obengterir a rengelekel a
Dirralomes er se er a lekot el
mo kiei el obengterir.

A Rengeldil a mlo merur er a
aike el di mla blekerdelel me
ng mlo melasem el meruul er

ngii el mo ungil.

A demal a Rengeldil a dimlak
el lebo el ungil el smecher.

A uriul e a Rengeldil a kmal
mlo orrenge a tekingel a

delal me a demal e ulengeseu
er a rokui el ureor er a blai.

V. OMESODEL:

Moluches a uldesuiu el kirir
tirka el chad el ngar er eou. A
chomomdasu e ng ua ngara a
blekerdelir el chad.

Ngiralomes---

Dirralomes---

Taldil---

Rengeldil---

Delal a Rengeldil---

VI. OMESODEL:

Monguiu aika el ker el ngar
er eou e moluches a nger er
ngii er a eungel.

1. Ng ngara me a rengelekel a
Dirralomes me a Ngiralomes
a kmal mle mekedung e
meduch el loureor e a
Rengeldil a dimlak?

2. A Rengeldil ng milekera e mlo ungil a blekerdelel e mlo olengeseu er a Dirralomes me a rengelekel redil el meruul a ureor er a blai?

3. A lsekum a Rengeldil a dimlak el lebo el ungil a blekerdelel e a chomomdasu e ng mlo ungil a blekerdelel er se er a lebo el klou?

4. Ng ngara me a delal me a demal a Rengeldil a kmal mlo

ungil a rengrir er a Rengeldil
er a uriul?